

安岳縣志卷十

人物志

普州山不高而厚水不深而長鍾其正氣者爲忠臣爲孝子循循乎醇儒之風也卽偶得其閒氣餘氣上之可以建豐功偉績次之可以摘華採藻掇取巍科以鳴一時之盛峩眉耀彩江漢炳靈不是過焉地靈人傑吾於普殆低徊不能去

宋馮光戩明統志安岳人時李順已平諸將縱殺降附解體光戩白大將楊瓊止之自是降者日以千數按光

安岳縣志

卷十

人物

一

戩字惟穀唐馮宿後舉進士不第

牟袞前志字君華邑人曹學佺曰袞安岳人受學於多

岳先生端拱閒登進士第以文章名累官翰林學士有詩文行於世蜀人物志袞天禧閒致仕著書自娛

景泰宋史本傳字周卿普州人進士起家補坊州軍事推官後以尙書屯田員外郎通判慶州卽上言元昊雖稱臣誠恐包藏禍心當選主將練士卒修城池儲資糧以備不虞三疏不報俄元昊反又上邊臣要略二十卷遷都官知成州奏平戎策十有五篇會有薦

秦知兵者召對稱旨換左藏庫使知寧州任福敗徙原州元昊衆十萬分二道一出劉璠堡一出彭陽城入攻渭州葛懷敏援劉璠戰崆峒北敗沒敵騎逾平涼至潘原秦率兵五千從閒道赴援而先鋒左班殿直張迥逗遛不進秦斬以徇遇敵彭陽西裨將夏侯觀欲退守彭陽秦弗許乃依山而陣未成列敵騎來犯秦陰遣三百騎分左右翼張旗幟爲疑兵敵欲遁去將校請奮擊秦止之遣士搜山果得伏兵與戰斬首千餘級以功遷西上閣門使知鎮戎軍兼兵馬鈐

安岳縣志

卷十

人物

二

轄久之領忠州刺史徙秦鳳路馬步軍總管卒按宋史藝文志兵家景泰平戎議三卷邊臣要略二十卷

王應麟玉海議康定元年都官員外郎景泰上邊臣

要略一作要備二十卷敘自古將略凡二十篇平戎策三

卷十五篇書目景泰平戎議三卷凡十五篇皆平西夏之策

姚渙宋史本傳字虛州世家長安隋開皇中有景徹者以討平瀘夷策功爲普州刺史卒子孫遂家普州渙第進士監益州交子務發姦隱萬緡主吏皆當死渙曰戮人以干澤非吾志也義不蔽姦而已請於使者

願不受賞於是全活者衆知峽州宜都民爲盜所殘
縣執囚訊服以獄上渙移劾於他有司居亡何真盜
獲大江漲溢渙前戒民徙儲積遷高阜及城沒無溺
者因相地形築子城埽臺爲木岸七十丈繚以長隄
槩以薪石厥後江漲不爲害民德之徙知涪州賓化
夷多犯境渙施恩信拊納酋豪爭羅拜庭下訖渙去
無警終光祿卿年六十七按牟袞景泰姚渙三人牟
袞則同時馮如愚贈劉澤詩云地靈人傑誰稱首文
屬君華武硬弓劉澤號曹學佺爲有明一代聞人亦謂
志載之舊志削之甚謬

安岳縣志

卷十

人物

三

馮如晦舊通志安岳人進士性明察遇事果斷范純仁
帥環慶時有訟純仁不法詔置獄寧州命如晦往訊
力辨其誣富弼韓縝有詩述其事宋史范純仁傳純
仁徙成都路轉運使以新法不便戒州縣未得遽行
安石怒純仁沮格徙知慶州環州种古執熟羌爲盜
流南方過慶呼冤范純仁以屬吏非盜也古避罪譎
訟詔御史治於寧州獄成古以誣告謫亦加純仁以

他過黜知信陽軍卽此事

陳文佐通志易義無卷數陳文佐撰普州人按文佐皇祐己丑進士

汝顏明統志安岳人舉進士調鳳州幕職年未老請致仕仁宗嘉其早退特授太子舍人

蒲規蜀人物志字正臣邑人有文名為洪雅令始以嚴治終以仁濟洪人德之

杜田舊志字汝耕以文章孝行舉歷臨江一作江寧府教授終大邑縣丞有賢聲註杜詩補遺正謬行世按其書

安岳縣志

卷十

人物

四

今罕見惟漁隱叢話所引老杜補遺云肅宗正德初子美為拾遺岑參為補闕或問二人孰賢余曰子美賢或曰何以知之曰以其詩知之子美之詩曰避人焚諫草騎馬欲雞棲又曰明朝有封事數問夜如何參之詩曰聖朝無闕事自覺諫書稀至德初安史之亂方劇上皇在蜀朝野騷然果無闕事時邪又云鮑當孤雁詩云更無聲接續空有影相隨孤則孤矣豈若子美孤雁不飲啄飛鳴猶念羣誰憐一片影相失萬重雲含不盡之意乎

馮山宋史馮澥傳安岳人父山熙寧末爲祕書丞通判梓州鄧綰薦爲臺官不就退居二十年范祖禹薦於朝官終祠部郎中舊通志鄧洵武薦爲臺官山以不諳新法辭不就著春秋通解十卷通考作十二卷四庫書目馮安岳集十二卷宋馮山撰山字允南初名獻能安岳人嘉祐二年進士官禮部郎中山詩文本三十卷嘉定中瀘州周銳與山子澥集合刊之前有劉光祖太師右丞合集序及何惠固二馮先生文集序此本澥集全佚山集目錄雖具而自十三以後悉佚不傳

安岳縣志

卷十

人物

五

所存者惟詩十二卷徐氏傳是樓書目所闕亦同知散佚已久世僅有此殘本也山與梅堯臣蘇舜欽同時時已盡變楊劉西崑之體故其詩平正條達無翦紅刻翠之態其上金陵王荆公詩有更張漢法新句原序所謂當熙豐閒不能苟合於新法者於此可見蓋亦介立之士其人足重雖殘篇斷簡要不害其可傳至澥當靖康中奏罷李綱宣撫河西又受張邦昌僞命墮其家聲其集與山竝刻實爲薰蕕同器其不傳也正亦不足惜矣

趙開宋史本傳字應祥普州人登元符三年進士第大觀二年權辟雍正用舉者改秩卽盡室如京師買田尉氏與四方賢俊遊因訶知天下利病所當罷行者如是七年慨然有通變救弊志宣和初除禮制局校正檢閱官數月局罷出知鄆陵縣七年除講議檢詳官開善心計自檢詳罷除成都路轉運判官遂奏罷宣和六年所增上供認額綱布十萬匹減絳州下戶支移利州水腳錢十分之三又減蒲江六井元符至宣和所增鹽額列其次第謂之鼠尾帳揭示鄉戶歲

安岳縣志

卷十

人物

六

時所當輸折科等實數俾人人具曉鄉胥不得隱匿竄寄嘗言財利之源當出於一祖宗朝天下財計盡歸之三司諸道利源各歸漕計故官省事理併廢以還漕司則利害可以參究而無牽掣窒礙之患矣因指陳榷茶買馬五害大略謂黎州買馬嘉祐歲額纔二千一百餘自置司榷茶歲額四千且護馬兵踰千人猶不足用多費衣糧爲一害嘉祐以銀絹博馬價皆有定今長吏苟緣爲姦不時歸貨以空券給夷人使待資次夷人怨恨必生邊患爲二害初置司榷茶

借本錢於轉運司五十二萬緡於常平司二十餘萬緡自熙寧至今幾六十年舊所借不償一文而歲借乃準初數爲三害榷茶之初預俵茶戶本錢尋於數外更增和買或遂抑預俵錢充和買茶戶坐是破產而官買歲增茶日濫雜官茶旣不堪食則私販公行刑不能禁爲四害承平時蜀茶之入秦者十幾八九猶患積壓難售今關隴悉遭焚蕩仍拘舊額竟何所用茶兵官吏坐糜衣糧未免科配州縣爲五害請依嘉祐故事盡罷榷茶仍令轉運司買馬卽五害竝去

而邊患不生如謂榷茶未可遽罷亦宜併歸轉運司痛減額以蘇茶戶經立價以惠茶商如此則私販必衰盜賊消弭本錢旣常在而息錢自足朝廷是其言卽擢開都大提舉川陝茶馬事使推行之時建炎二年也於是大更茶馬之法官買官賣茶竝罷參酌政和二年東京都茶務所勅條約印給茶引使茶商執引與茶戶自相貿易改成都舊買賣茶場爲合同場買引所仍於合同場置茶市交易者必由市引與茶必相隨茶戶十或十五共爲一保并籍定茶舖姓名

互察影帶販鬻者凡買茶引每一斤春爲錢七十夏五十舊所輸市利頭子錢竝依舊茶所過每行征一錢住征一錢半其合同場監官除驗引稱茶封記發放外無得干預茶商茶戶交易事舊制買馬及三千匹者轉一官比但以所買數推賞往往有一任轉數官者開奏請推賞必以馬到京實收數爲格或死於道黜降有差比及四年冬茶引收息至一百七十餘萬緡買馬乃踰二萬匹張浚以知樞密院宣撫川蜀素知開善理財卽承制以開兼宣撫處置使司隨軍

安岳縣志

卷十

人物

八

轉運使專一總領四川財賦開見浚曰蜀之民力盡矣錙銖不可加獨權貨稍存贏餘而貪猾認爲己有互相隱匿惟不恤怨詈斷而敢行庶可救一時之急浚銳意興復委任不疑於是大變酒法自成都始先罷公使賣供給酒卽舊撲買坊場所置隔槽設官主之麴與釀具官悉自買聽釀戶各以米赴官場自釀凡一石米輸三千竝頭子雜用等二十二其釀之多寡惟錢是視不限數也明年遂徧四路行其法又法成都府法於秦州置錢引務興州鼓鑄銅錢官買銀

絹聽民以錢引或銅錢買之凡民錢當入官者竝聽用引折納官支出亦如之民私用引爲市於一千并五百上許從便增高其直惟不得減削法旣流通民以爲便初錢引兩料通行纔二百五十萬有奇至是添印至四千一百九十餘萬人亦不厭其多價亦不削宣司獲僞引三十萬盜五十人浚欲從有司議當以死開白浚曰相君誤矣使引僞加宣撫使印其上卽爲真黥其徒使治幣是相君一日獲三十萬之錢而起五十人之死也浚稱善悉如開言最後又變鹽

安岳縣志

卷十

人物

九

法其法實視大觀東南東北鹽鈔條約置合同場鹽市與茶法大抵相類鹽引每一斤納錢二十五土產稅及增添等共納五錢四分所過每斤征錢七分住征一錢五分若以錢引折納別輸稱提勘合錢共六十初變榷法怨詈四起至是開復議更鹽法言者遂奏其不便乞罷之以安遠民且曰如謂大臣建白務全事體必須更制卽乞劄與張浚照會詔以其章示浚浚不爲變時浚荷重寄治兵秦州經營兩河旬犒月償期得士死力費用不貲盡取辦於開開悉知慮

於食貨算無遺策雖支費不可計而贏貲若有餘吳玠爲四川宣撫副使專治戰守於財計盈虛未嘗問惟一切以軍期趣辦與開異趣玠數以餉饋不繼訴於朝開亦自劾老憊勾去朝廷未許迺特置四川安撫制置大使之名命席益爲之益前執政詔位宣撫司上朝論恐未安仍詔張浚視師荆襄川陝六年罷緜州宣撫司玠仍以宣撫治兵事軍馬聽玠移撥錢物則委開拘收尋除開徽猷閣待制加玠兩鎮節鉞復降旨都轉運使不當與四路漕臣同繫銜成都潼

安岳縣志

卷十

人物

十

川兩路漕臣與都轉運使坐應副軍支錢物愆期各貶二秩朝廷故抑揚之使之交解閒隙趣辦餉饋也而開復與席益不和抗疏乞將舊來宣撫司年計應副軍期不許他司分擘支用又指陳宣撫司截都漕運司錢就果閬糴米非是又言應副吳玠軍須紹興四年總爲錢一千九百五十五萬七千餘緡五年視四年又增四百二十萬五千餘緡蜀今公私俱困四向無所取給事屬危急實甚可憂乞許以茶馬司奏計詣闕下盡所欲言朝廷旣知開與玠及席益有隙

乃詔開赴行在以李迨代之會疾作不行提舉江州
太平觀七年復右文殿修撰都大主管川陝茶馬開
已病累疏丐去詔許從所乞提舉太平觀十一年卒
論曰趙開所謂可使治其賦也歟

馮儼字望之邑人以明經舉授乾州判官以詩名康熙
四川總志雅州名宦宋馮儼安岳人知榮經時有沈

黎部落之警儼作雄邊寨以戍之軍民奠居焉

通志同近

府縣志皆載於明誤

劉儀鳳宋史本傳字韶美普州人少以文謁左丞馮澥

安岳縣志

卷十

人物

十一

澥甚推許遂知名紹興二年登進士第抱負倜儻不
事生產於仕進恬如也擢第十年始赴調尉遂寧府
之蓬溪監資州資陽縣酒稅爲渠州榮州掾紹興二
十七年有旨令侍從薦士起居郎趙逵舉儀鳳稱其
富有詞華恬於進取宰執上其名上曰蜀人迢遠文
學行業有可用者不由論薦何緣知之前此蜀仕宦
者例多隔絕不得一至朝廷殊可惜也自秦檜專權
深抑蜀士故上語及之尋除諸王宮大小學教授召
試館職辭以久離場屋改國子監丞宰相以其名士

遷祕書丞禮部員外郎所草牋奏以典雅稱孝宗受禪議上光堯壽聖尊號冊寶有欲俟欽宗服除者太常博士林栗謂唐憲宗上順宗冊寶在德宗服中不必避備樂而不作可也儀鳳獨上議曰謹按上尊號事屬嘉禮累朝必俟郊祀慶成然後舉行太上皇帝爲欽宗備禮終制見於詔書議者引憲宗故事考之唐史自武德以來皆用易月之制與本朝事體大相遠也乞候欽宗終制檢舉以行則國家盛美主上事親情實稱矣議者雖是其言然謂事親當權宜而從

安岳縣志

卷十

人物

三

厚竟用栗議儀鳳復爭辯不已尋兼國史院編修官兼權祕書少監乾道元年遷兵部侍郎兼侍講儀鳳在朝十年每歸卽匿其車騎扃其門戶客至無親疎皆不得見政府累月始一上謁人尤其傲俸入半以儲書凡萬餘卷國史錄無遺者御史張之綱論儀鳳錄四庫書以傳私室遂斥歸蜀三年十二月輔臣進前侍從當復職者上曰劉儀鳳無罪可與復集英殿修撰起知邛州未上改漢州果州罷歸淳熙三年十二月丙申卒年六十六儀鳳苦學至老不倦尤工於

詩然頗慕晉人簡傲之風不樂與庸輩接故平生多
蹭蹬一跌遂不振云論曰劉儀鳳節概著於行事庚
溪詩話劉韶美侍郎蜀之普州人性酷嗜書喜傳錄
初以禮部侍郎攝祕書少監後卽眞凡祕府書傳寫
殆徧如國史之類又置副本親自校讎至杜門絕客
遷兵侍猶傳寫不絕張持國之綱爲副端言其書癖
至曠廢職事以是罷歸蜀關壽卿以詩贈行詩云清
議久不作世無公是非祇因翻故紙不覺蹈危機東
壁夢初斷西山蕨正肥十年成底事贏得載書歸按

安岳縣志

卷十

人物

三

儀鳳著有奇堂集及樂府等書行世

馮憲朝野雜記淳熙中畱丞相帥蜀議者奏取黎雅二
州民兵依利路義士法措置乃與總領財賦馮憲廷
式共議遣本司幹辦公事馮震武傳之往二州籍之
州選二千人分上次等上
等六百人爲點集之丁依
諸州軍弓手例月給錢三千五百次等千四百爲居
守之丁依龍州弓箭手例月給錢一千二百皆以五
十人爲一隊擇有物力材幹者爲隊長月給各倍之
教頭以下差減又陳端仁爲帥馮廷式爲成都漕端

仁有聘幣廷式例以元物易封而報之端仁大恨至用他事劾廷式於朝壽皇知之不信也廷式名憲普州人淳熙末卒於司農卿總領四川財賦

馮坦宋詩紀事坦字伯田號秀石普州安岳人兩魁浙漕咸淳辛未推恩任渝之江津夾漈務西總之龍灣灑庫有絕句云山腰一抹雲雲起知何處急渡小橋尋天風忽吹去

明黃珏江南通志安岳人洪武二年知鹽城縣革弊除奸廉介有爲

安岳縣志

卷十

人物

古

王縉紳蜀人物志安岳人永樂十三年進士歷官監察御史按浙江擢湖廣僉事懇乞致仕家居不入城市講學於真南書院遠近稱真南先生舊志歷官監察御史按浙江先後章奏皆見推行致仕歸與楊冕孫茂等講學士無遠近負笈從遊前志稱曰肅清風憲裁抑貴權金玉文章山斗節行

孫茂字廷蘭邑人以翰林院庶吉士改授禮部儀制司主事歷主客司郎中立品端方時上疏諫諍多所裨益有輔弼大臣之風爲同僚所儀

程用貴邑人字秉良洪武中以明經舉授浙江道監察御史直言骨鯁多所建白後擢知長沙府終河南按察司副使卓有政績

王文彬普守壽之子以明經舉授陝西鳳縣知縣在任以誠信化民政有異績士民咸欽戴不忘

吳憲字廷章邑人弱冠領鄉薦屢上春官不第授鄆縣教諭文學教化鳴於關中秦隴聞風來學者約數百人尋轉國子助教成化初特陞翰林院檢討與修國史以疾致仕前志稱曰雨肥鹿洞秩進鵷班

安岳縣志

卷十

人物

五

楊冕字致美邑人天順元年進士授階州知州庚寅西番據石城叛都御史項忠薦冕以僉事整飭平涼固原蘭靖兵備俘獲甚眾後亂加斯蘭寇邊募兵捍禦有功都御史余子俊薦爲按察副使前志稱曰威鎮遠夷才堪邊務

楊春武功縣志安岳人勤以教人而嚴以守之士畏敬感激無異存日

徐珪字國瑞邑人官至浙江左布政整綱飭紀宣布德化卻暮夜金清廉著節致仕後安貧自守不接賓客

里人皆慕其高風。貴州通志：安岳人成化二十年按察使寬嚴調濟讞獄周詳必反覆無可出處而後入之民不以冤尋陞左布政使。按徐珪天順八年進士李萼字完之。通志作元之邑人成化閒由舉人任陝西慶陽府通判尋陞同知以余司馬子俊薦授山西僉事儲備賑荒有惠政。歷陞福建按察使平反冤獄僚吏服其明決卒於官。崇祀名宦。

于瀛字登賢邑人登京闈賢書父孟暉卒京邸扶櫬還葬徒跣萬里後判澂江府民有冤獄力辨其誣再判

安岳縣志

卷十

人物

六

金華府尋卒於任前志稱曰鑑推明決冰雪操持

堯卿一統志安岳人成化中銅仁知府為政恬靜事上之禮甚簡常曰剝民以求媚吾不為也民有爭訟數語立解在任九年民化其德舊志字廷輔邑人甘貧務學登天順進士知昭化縣有異政擢太僕丞知銅仁府威著苗疆黎民安堵前志稱曰循良蚤步龔黃邊略依稀韓范

王璿字宗舜邑人成化丙戌進士知臨淮潔已愛人政聲大著擢監察御史以抗論出知宜郡。省志作都又歷宣

城江陵咸有嘉績擢倅楚雄及知巡甸皆以禮義化之巡甸之有衣冠文物自璿始

胡倫一統志宏治中知鄖陽府有武陽盛水二堰溉田甚溥歷久淪沒倫割俸董治至今利賴蜀人物志秩滿當遷忤逆瑾歸鄖人慕之鑿井治西皆曰胡公井李常字恆吉邑人庠生累困棘闈晚由貢分教莊浪衛學訓課不倦始終以清苦自持士人化之致仕居家鄉人觀其動止以爲步趨其見信於人若此

章憲極字錫疇邑人貢生燦垣之子以鄉舉任彭山令

安岳縣志

卷十

人物

七

有治聲

湯紹恩明史循吏本傳安岳人以嘉靖五年擢第十四年由戶部郎中遷德安知府尋移紹興爲人寬厚長者性儉素內服疏布外以父所遺故袍襲之始至新學宮廣設社學歲大旱徒步禱烈日中雨卽降緩刑罰恤貧弱旌節孝民情大和山陰會稽蕭山三邑之水匯三江口入海潮汐日至擁沙積如邱陵遇霖潦則水阻沙不能驟洩良田盡成亾浸當事者不得已決塘以瀉之塘決則憂旱歲苦修築紹恩徧行水道

至三江口見兩山對峙喜曰此下必有石根余其於此建閘乎募善水者探之果有石脈橫亙兩山閒遂興工先投以鐵石繼以籠盛鰓屑沈之工未半潮衝蕩不能就怨讟煩興紹恩不爲動禱於海神潮不至者累日工遂竣修五十餘尋爲閘二十有八以應列宿於內爲備閘三日經漚曰撞塘曰平水以防大閘之潰閘外築石隄四百餘丈扼潮使不爲閘患刻水則石閒俾後人相水勢以時啟閉自是三邑方數百里閒無水患矣士民德之立廟閘上歲時奉祀不絕

安岳縣志

卷十

人物

七

屢遷山東右布政使致仕歸年九十七卒

國朝毛奇齡湯公別傳湯紹恩安岳人生時夢神捧兒至而拜之曰吾紹興城隍神也旣生峩眉僧過門施之飯請名僧以指掄計曰當以紹名他日東方有承其恩者其在紹乎因名紹恩字汝承嘉靖五年登進士釋褐衣越布覆以父官參政時所遺絲袍終其身不之易十四年以郎中出知德安府旋改紹興甫到謁禹廟周視其構櫺若故識者先是紹苦地浙春秋所稱澤國也水濫地在浸中水驟下而龜其腹山陰縣

東南有浦陽江者爲三江之一韋昭有云松江浙江浦陽江也浦陽江上接金華浦江諸水北流百餘里至諸暨與東江合北過峽山東匯山陰之麻溪然後盡注錢清江而入之於海當是時浦陽已通浙第口隘浙當高時水反入浦陽而灌麻溪而錢清之入海者勢若建瓴則又傾漑而不可復止其所以旣苦潦又苦曠者概爲是也紹恩至相浦陽上流恢前守戴琥所開績堰使浦陽之通浙者坦而易洩而乃塞麻溪以遏其來不使浦陽之水得復入山陰東南於是

安岳縣志

卷十

人物

九

相其尾閘凡在紹諸水濫則易浙漑則易竭者爲水防海濱將以伺瀦瀉而定啟閉而無如海波之瀕洞而難爲坊也初錢清下流原有二閘歲久湮廢紹恩相下流仍得之三江之口其地夾兩山爲浦陽入海故道下有石峽橫亘數十丈泅水者得之乃伐石於山依峽建閘石牝牡相衡烹秣如炭以膠之石之激水者卽剡其首使不得與水爭下有楹而上有梁施橫坊其中刻平水之則於柱石閒而啟閉之兩隄築土冶鐵而澆其根閘凡二十八應二十八宿隄數百

丈而大閘之內又置備閘數重曰經漚曰撞塘曰平水閘一年工成共得良田一百萬畝漁鹽斥鹵桑竹場畷亦不下八十萬畝而紹興於是稱大府沃野千里紹恩之力也初紹恩築隄隄潰有豚魚千頭乘潮而上衆驚告紹恩紹恩曰此隄成之兆也在易之中孚豚魚吉利涉大川吾以誠信革豚魚尙患涉乎立令入水築人多怨讟又其時潮大至見者洶洶紹恩堅不顧且請禱於海潮忽下望隄而卻以爲神云後以次遷去歷官布政使年九十七卒論曰漢後言水

安岳縣志

卷十

人物

三

利者率水工穿渠注填闕之流以漕以漑用能稍入餘稅濟少府錢未有鍾大利久遠惠一方民若紹恩者也循吏少有益於民民得吏治一二年稍蘇息猶藉藉稱惠政以爲罕見得紹恩是治而有不尸祝之世世也乎宜紹興祠之以爲湯君神矣

彭世爵嘉靖辛丑進士爲庶常居官多政績才學爲當時所推重前志稱曰廉畏四知才雄八斗因萬厯志脫簡行實無攷

石天麟字信菴孝友宜家篤學不倦四十二年文運中

興藉焉

李蒙吉字正軒歷貴州鎮寧知州前志稱曰掀揭才猷
湖海性度當官績著循良居鄉德稱孝友

楊魁字雲莊歷襄城知縣前志稱曰渾完之璞粹鍊之
金莅政公廉宅心清白

蔡聯甲字普巖威遠訓導前志稱曰士行素敦於梓里
師模雅重於威庠既托林泉遂忘城市其品行爲一
時所推重膠庠所模範

余岱湖南通志安岳人零陵縣丞之官不攜妻孥公退

安岳縣志

卷十

人物

三

一室蕭然惟圖書而已

國朝張象樞字四木明侍御任學子康熙癸卯舉人吳逆
之變行遯不屈隱於峩眉之菊溪蜀平後授廣安州
學正著有雪浪齋集全蜀詩匯四木詩爲費仲若所
賞識然奇拔獨出能於費氏外別立一幟者

張象翀字六飛象樞弟康熙甲辰進士幼孤致祭日設
奠盡哀如初喪以孝聞下筆爲文亦根柢至性粹然
不疵著有處和集始宰饒陽力請裁減驛站邑多偷
盜廉得首惡盡法治之盜風頓息擢知膠州設養生

堂葺藥室撫嬰療病全活甚衆內擢工部都水司轉
兵部職方司主事致仕歸又象樞之弟象華字五華
順治閒拔貢俱以詩名李調元雨村詩話康熙初安
岳有三張皆能詩謂象樞及弟象華象翀也詩採外紀按
象翀崇祀鄉賢祠

張翔鳳字鳴岡號南野康熙辛未進士選翰林庶吉士
歷吏部文選考功司郎中典試廣東時稱得士終建
寧知府按前邑志作祥鳳象翀族裔安岳永康鄉人
富順籍通志故載入富順今竝存之

安岳縣志

卷十

人物

三

周嗣胡字參兩號遜菴性敏才高年十五入泮博涉子
史淹通文藝累舉不第隱居城南仁里莊傳授生徒
開一時文章之宗言行不苟爲士林所推重晚年絕
跡市塵忘情富貴以詩酒自娛有五柳之風生五子
于仁等皆以文藝名

汪之洋字濟遠敏達多才尤以直名在庠三十餘年素
繫人望督修城署不辭艱苦經畫周詳其功最多

蔡朝縉字調鼎邑庠生棄不就試以詩酒自娛博青囊
術喜遨遊名山佳水得上池方活人最多才幹敏達

督修城署大有功

鄒瑄前志字犀坪歲貢歷任劍州學正致仕歸居折桂鄉之龍原年八十餘大廣教澤從遊甚衆方正不苟人仰之稱爲折桂夫子

熊化隆前志字飛生學博品高累舉不第嘗設教於香雲之巔從遊甚衆邑中子衿半出其門康熙間歲貢周于仁號仙山生而穎異年十二補博士弟子員旋食餼舉孝廉後卽以振興學校爲先務請於邑令鄭吉士捐募勸建鳳山書院於城南至今所移之龍泉書

安岳縣志

卷十

人物

三

院皆其舊也鄭吉士纂修樂安縣志搜羅採訪皆以一人任之雍正間之福建永春任不以家累隨將到時夢人投一聯云只應憐新婦不須念故交莅任有吳一妹者爲前令鄭屈拘鄭固同年也閱牒見案豁悟察實釋之邑稱神明焉時方禁藏銅又徵枌木激厲有方民不以爲勞復捐廉修梯雲扶雅同文三館以造士文風爲之不變歷年聽訟無冤民每讞一獄民豎一旗及調將樂旗將盈百撤所豎材建迎暉門外溪橋民目爲平政橋歲餘遷臺灣別駕惠政皆如

在永春時致仕歸卒於漢陰假銀三百乃扶櫬歸衣冠外無長物惟載書數千卷而已著有澎湖志略渡海輿記暮遊集藏於家崇祀鄉賢所任之處崇祀名宦

鄒升元號七盤舉人任湖北大冶令其俗刁悍抵任繩以法奸僞屏迹中丞晏斯盛雅重之曰此真讀書人也與沈歸愚相唱和并贈以詩後以直戇忤當道歸教授生徒成者甚衆性專篤而冥悟功多嘗於馬上作文抵夜始覺迷路去所之幾百里每謂聖賢義理

安岳縣志

卷十

人物

三

祇在人意中故構思至忘寢食爲文一本成宏尤工詩善書楷學柳草學懷素至今得其隻字者爭寶之周文席節錄王應鵠雲居先生傳公字儒珍濂溪二十五代孫也精周易尤嫻史學與兄文庸公同試一膺府拔一膺縣拔邑令目曰雙陸二程弱冠舉於鄉選湖北宜都縣令愛民禮士不事煩苛未數月調鄉試考官時縣有人命事二郡守委員往訊已擬償公歸廉得其屈直之郡守怒危語怵公公執愈堅郡守以失出劾公公不與辨觀察金公憐之曰郡守忌君甚

盍改教職公曰殺人以媚人先夫子濂溪所不爲也
委手版求去觀察書盛世循良四字以榮其歸且爲
祖餞公仕未暮年負債累千無以償民曰公仁人也
爲我等去官忍責公償悉毀券去及歸講學岳陽從
遊甚衆峴開發周元位劉維旄暨鵠等皆出其門學
者稱雲居先生卒年八十一歲子三長永祚以明經
任儀隴教諭次永冀三永第郡庠生

鄒楠節錄王炳瀛鄒公傳公諱楠號紫峯別號澹遠父
淑華以明經選彭縣訓導不仕剛直嚴明廉介不苟

安岳縣志

卷十

人物

三

公其三子也幼凝重聰穎過人癸酉選拔明年

廷試列二等主挑者以科甲人俟之注銓州別駕歸邑
侯延掌鳳山書院負笈者戶不能容邑令郭公匾其
堂曰學德堪師擁皋比者十六年庚寅登賢書辛卯
應禮部試歸築室東山顏其園曰學圃亭曰觀稼暇
則鼓琴澆花以自娛而問字者遠近益于然來且
多歌鹿鳴捷南宮去也公性孝友家世清貧筆耨之
資盡以博二人歡居喪幾至滅性邑令婁公贈有令
爲高賢廢蓼莪之句且素負經濟才部銓及之以老

不仕然莅茲土者往往造廬而咨民瘼公亦樂以有裨於政治者告之庚申春賊入境爲邑令楊公籌團練堅壁清野倡築天馬砦全活甚衆又議置學田社田士民感之尤好利濟如建橋梁治道路必捐貲爲倡樂觀厥成其學純正精易理於周子圖說獨得心解平日講貫務以發明理學爲宗經史外凡諸子百家靡不究覽著有學庸輯解讀史輯要策略便覽書法津梁筆談等集藏於家書則真行草隸兼擅其長畫工松竹人爭羨焉暮年精神矍鑠心力明且健遇

安岳縣志

卷十

人物

三

知己娓娓談名理夜可達旦雖少壯人不及也其屬纊前一日尙作文課幼孫絕筆詩結云不隨流俗喪天真此殆生平學力之所至歟壽八十九學者稱紫峯先生道光甲午冬以品行端方學問純粹崇祀鄉賢祠子長榮廩生長燦歲貢長原增貢孫支繁衍俱能守其家學以取科名云

蔡齊明號晴軒由拔貢中北闈舉人以四庫館議敘任文水令獲鄰封逆犯陞太原同知尋陞饒州知府調南昌首府時寧州邪匪肆擾迅卽撲滅撫軍卽欲保

舉明力阻後引

見奏對以不能防範於先有失察之咎

上諭褒獎謂不敢邀功歸美巡撫彼躁進冒功者寧不聞而滋愧耶

賜退讓可風四字補天津道轉江安十府糧道署江蘇按察使司居官清正謹恪所任之處循聲嘖嘖後卒於官子應聘同知

王應鵠節吳傑東園公傳公諱應鵠號東園品端學邃以明經登癸卯賢書丁丑奉部檄選元城知縣附郭

安岳縣志

卷十

人物

三

大名界連齊豫民俗強悍訟獄繁滋公明敏廉平日坐堂皇案無畱牘有兄弟構訟累控不決諭以骨肉之義爭者感愧而去嘗躬入鄉村勸農遇呈訴者就林木陰翳處訊之竝戒以勿好訟曰事屬可已何必興訟害義傷財於汝孰利故每有懷牒而退者士民愛戴如慈父母匾其堂曰沙麓風清紀實也復捐廉設賙卹倉施畱養局新束皙祠以爲禱雨之所築紅花隄以爲水道之防落成記詩云禱應霖三日瀾安葦一航庚辰閒武陟河工需辦稽料羽書催督甚急

惟元城妥速鄰邑幾有激變者延公曉諭始散改調
永年力辭旋告歸就養京邸逾年還鄉樂林泉者復
數年先公未仕時講學龍泉以明體爲先達用爲務
長次諸君皆未嘗出就外傳也歲庚申賊渡潼河與
縣令籌守禦計賊不敢近仍講誦不輟著有石華經
說制藝詩集文集等書年七十九卒崇祀鄉賢祠子
五炳奎太學生炳瀛翰林院侍講炳棠增貢生炳麟
進士卽用山西知縣炳雯郡庠生

汪鳴韶號獅巖年十二冠軍入邑庠旋拔貢家貧奉孀

安岳縣志

卷十

人物

三

母楊氏滄澹不缺邑令欽其品望延主鳳山講席朔
望習禮儀出其門者皆循循雅飭一時稱盛尤工詩
擊鉢立就著有竹閒叢話

馮謙號六吉以歲貢任西昌教諭品行端方介介不苟
士林共仰稱爲篤實君子

鄒長濬節錄左廷賓哲亭先生傳公諱長濬號哲亭生
有異稟幼失怙從紫峯伯父遊深器之以明經舉孝
廉家固清貧講學爲業或謂曰君弟兄衆盍析居公
正色曰父早逝母苦節不孝不弟之行於心安乎訓

徒時常言於書有疑輒師延平先生默坐沈心體認天理之語數年後覺有得故於宋儒書辨析甚精公爲人廉介正直士林咸矜式之前後主講書院數十年人莫敢干以私出其門者多方正之士其掇巍科如譚言藹周昂潢邱開來等皆受業焉銓至不就以翰林院典簿職終晚年詩有惟與日爭光之句其志節可概見矣著有學庸義鈔藏於家

周榮基字介卿穎悟過人十三經廿二史皆通習之從汪獅巖遊受知於吳壽庭中壬子經魁爲文頃刻立就如長江大河渾灝流轉三赴禮闈薦而不售後下堂傷其足遂無進取志教授生徒得其講畫爲文皆有法度可觀卒後有介卿時藝千餘篇

安岳縣志

卷十

人物

三

譚言藹節孔傳綸靜山侍御傳君號靜山晉封朝議大夫高峯公諱紳三子也高峯公敦孝友謹言行篤志好學不求仕進君幼凜父訓性警敏涉獵經史過目成誦補博士試輒冠軍學使異其文曰翰苑才也尋聯捷入詞林假歸纂修通志著辨譌篇及陞江南道監察御史轉掌雲南道監察御史彈劾不避權貴風

骨凜然家固貧而清操自持常徒行入直見者目爲
眞御史移疾致仕掌草堂書院以誠意正心爲本繹
白鹿洞學規以訓士著詩經集解蒙求箋註詩韻增
註姓氏考辨等書行世議者稱爲蜀中文獻云道光
十三年與父紳同祀鄉賢祠子樹森增生

安岳縣志

卷十

人物

三

鄉賢志

士君子生為名宦沒為鄉賢為善原最樂也普邑鄉賢登仕版者固多其有讀書明道言可為坊行可為表與夫亮節高風能使頑廉懦立者皆名教之干城也熙朝崇祀之典特隆於奕禩有以夫

宋景泰

見人物

景思忠

見忠節

明王縉紳

見人物

吳憲

見人物

楊冕

見人物

堯卿

見人物

于瀛

見人物

王璿

見人物

安岳縣志

卷十

鄉賢

三

湯佐

見孝友

湯紹恩

見人物

張謨

見隱逸

彭世爵

見人物

張澄

見忠節

國朝張象翀

見人物

周于仁

見人物

鄒楠

見人物

譚紳

見人物譚言藹傳

王應鵠

見人物

譚言藹

見人物

